

端
巖
公
年
譜

張文麟 自敘

中
華
書
局

端巖公年譜

明中憲大夫建寧郡守 張文麟自敘

國朝 九世孫 海鵬校刊

成化十八年壬寅正月初十日卯時文麟生於今所治居第時封承德郎刑部主事先公晚翠先生往候外大父推府孟陽盧公於河南南陽府盧公諱旭字景昭舉人信之子未回是日天寒所居草舍壁不遮風落地後先祖母韓夫人方治湯沐沐後口漫白涎沫鄰嫗弓媽媽聞之急來持抱以兩乳覆護之良久方甦三月後先公方歸血軀已變瑩潤如玉喜甚因揭所攜書書於禮記冊後先夢於大江中獲一巨鯉遂名文麟今改爲麟得于祖母韓夫人母盧夫人之旨

成化十九年癸卯二歲

成化二十年甲辰三歲

成化二十一年乙巳四歲不記三歲四歲出痘韓夫人抱臥於腹愛不舍着蓆時或戰戰驚躍每以沸湯或聚湯灌口則止至五六日痘不起幾於危殆時有扶鸞召神值土神周孝子降大書無事吾能力保且書一符粘于房書令蔡太保盛痘因治供神素物餉扶鸞者未畢韓夫人急呼曰吾耳聞如蟹噴噴聲迫視之則額上痘疹俱肥胖發起矣遂獲生吾家爰崇奉周神至今不替得于祖母韓夫人母盧夫人之旨

成化二十二年丙午五歲。每轡遠韓夫人覓糖飴。一日遠夫人身旋轉不已。夫人戒之曰。轉頭暈跌了。予應之曰。周流四方。夫人大喜曰。此兒日後長進。至今猶自記不忘。

成化二十三年丁未六歲。先公命就外傳。即今所居巷南十數家。有錢先生者。拜爲師。錢教村學。市井童子約三十餘人。每日止授予神童詩四句。且令他生教之。不能成誦。

宏治元年戊申七歲。改從靈公殿東住頭一家任先生。先生訓導有方。日有定規。凡所背書。每先日授。次日晨入。則背昨所誦書。次習字。散午後。令誦昨所授書。必熟背。背熟再授明所誦書。吾性於書。必先誦。至次日復誦數遍。則熟得先生教法如此。諸同學背書。我爲最熟。遂稱聰明。

宏治二年己酉年八歲。

宏治三年庚戌年九歲。

宏治四年辛亥年十歲。從東鄉繆廷善先生。先生歲貢士。與先公友善。故命從之。而先生教法無常。與任先生反。每自出外。稚性懈弛。遂至書背不出。端巖子曰。一予耳。從任先生則聰明。從繆先生則喑啞。人家子弟少有資質。全在先生之善教不善教耳。

宏治五年壬子年十一歲。復從任先生。四書得熟誦。讀禮記起。

宏治六年癸丑年十二歲。隨先公學于蘇州湯氏。湯稱爲湯煎膠家。其學子名保。蘇有蔣巖者。聰明著異。下與予同庚。已做秀才。不知從何人經湯氏館。見其從者。肩書一束。約數十本。先公指示之。以歆助吾意。

蔣隨補廩。乙卯科舉。朋輩引入非禮之所。漸成疾。年十七而亡。後先公館於穿山劉氏。劉與蔣姻親也。因攜其所遺東壁稿見示。皆論策。真是奇才。而不自檢束。遂至天亡。人家有聰俊子弟。不可不謹視之。是年五月。鼻衄爲甚。塞左則右出。兩塞則口出。以冷水漬手而易之。二盆水俱赤。先公驚訝。且緩讀書。倩人背至齊門。趁船回家將息。至七夕歸。見子面無色。仍止讀書。至重九。方攜至湯氏館。初於正月中旬。至蘇。先公旅食于鄭海有容氏。鄭一日約先公同詣一處龜卜。子亦隨行。記卜者居於水邊。面西。牌寫雲間張氏。時先公祝龜。卜子甲乙學舉。丙丁學醫。卜者曰。必學舉。且易成。若學醫。後亦廢醫而學舉。言畢。少坐。復有爆卜聲。卜者指先公曰。是先生袖中龜出。視之。乃自來一枝。卜者喜曰。必習舉業。此文書官貴爻所發。名爲仙人上馬卦。若科舉秀才占得。決中。復取龜經與先公驗看。後先公頗懷疑。過龜卜者。輒與視之。言好怯者半。子習舉業。不四五年而通大義。遂中魁。中進士。占者之言爲信。以此推之。數固先定。然必業之精進。乃不負占者之精驗。學者可不自用其心哉。

弘治七年甲寅。年十三歲。先公硯荒於家。自課子誦習。六月初一日。自縣學升散。入門卽命子曰。今日朋友對我云。令郎學舉業。三場通了。你尙未曾。今係好日。學起。出學而時習之一題。授以活套拔萃老書二帙。云觀此作文。時先公無力市時文。只此而已。任子抄扯成篇。三五日後。遂出君子務本一句。無所抄看。不知作何等語。先公含之。今不自知其成章與否也。

宏治八年乙卯。年十四歲。時先公至友陳金周尙古。其子應春。先子一日而生。延師陳子身先生于家。邀

予附學子身先生家世善教。三四日後。欲試予書生熟。一日教背。每於絕句。忽提一句。予應誦如流。先生喜。乃加意日課。予作文一篇。一日忽命題有顏回者。好學。予問先生曰。有二處。先生曰。後頭顏回。蓋先生默許予也。乃不經意作一篇送上。先生曰。不用心。再做。復作一篇。時尙未午。先生默而收之。至五月五日。先公自館回。先生慕至。予於壁壁竊視。先生對先公喃喃數語。乃出所考顏回好學文。以示先公。先公有喜色。予亦自信。乃知向學矣。是年春三月。先生偶出。同庚兄陳應春市魚鮮一荷。葉包搗冷酒一壺。邀予遊山。空腹飲三四盃。已醉。隨其踰山。至西門。入程尙書花園。今歸郡守八十一翁陳東麓。彼固有僕。予安得有哉。尾其遇河。履船緣而走。墮水幾喪。若有神護。止飲水數口。直立而起。帶水頂泥而歸。先母太安人。且驚且喜。易乾衣。撫就寢。先公聞之。奔回。自慶無恙。亦不忍治。止令先生責數板而已。於呼愛子如先公。而不能有人以衛其子。父生止吾一子。而不能自衛其身。幾至危喪。痛定思痛。言之可以垂戒。吾子若孫。其尙體之哉。念之哉。

宏治九年丙辰。年十五歲。時刑部員外郎張起齋應治。名鳳來。彼時字號若此。於乙卯以儒士應舉。聲譽蔚然。先公與其尊人克理先生同庠。榜。因命予拜克理爲師。實資起齋麗澤。然克理先生講貫亦精。到下筆則少差。每患日疾不出。則命起齋命題。予至起齋家。不數日。忽起齋爲予告曰。家母言夜夢後巷張家新造大門面。不知如何塗以穢物。後日汝大富貴。今亦不失爲富貴之人。然亦小就耳。乃一至起齋所。即見夢於吾師母。可知境遇皆前定。貴人勉力以進修耳。

宏治十年丁巳年十六歲家居治業讀禮要完然未習學策論一日先公攜舊時手錄一冊鄉村麟曰此王探花論細讀之亦少會其首尾節次然未嘗作數篇於策則尤未學也

宏治十一年戊午年十七歲時當大比知縣楊柳塘諱子器字名父先生蒞縣先生實冠七縣作與文學之主先考儒士命題四篇四書微者微也助者藉也經大則如威小則如愧論正己以格物策問張真諸萬堯陶潛范仲淹人品優劣如何舉筆皆成章半晚納卷先生亟稱許焉問何以讀禮記告以先公舊經先生曰中得何不往餘姚從講對以力不能先生曰我那裏從師講書一雙草鞋背三斗米就去了何難先生乃默留意次年送予從餘姚諸先生用晦先生諱絢辛酉舉人乙丑與余同登進士講禮取送府考府主河南曹鳴岐先生諱鳳以御史出守蘇州後予第進士先生陞都御史入京於朝房一見時先生已病不二三日遂歸不及致寸敬至今猶切景仰焉命二題其若是孰能繁之論實學取十四人以同年姚天章奎爲第一後天章與予爲甲子同年予第二叫名畢舍第一而獨呼予上前喜溢顏面口誦四書中警句稱許不置送察院考時提學方信之先生取人精敏而命題嚴切學力未周四書本經策論得此失彼不錄先公曰府主有引進汝意盍往求之及門門吏呵斥府尊自見呼進時與衆官候察院晨揖府佐衛揮皆旁列府尊笑語曰此常熟縣小秀才我考決中經解予因告求一言府尊曰我也不說你也不消我說回去讀書決中經解令揖而去既出復呼入叮嚀用功勿負我望遂歸

宏治十二年己未年十八歲妻父招同其子文祥讀書纔三月用晦諸先生來就河陽徐氏文輝臨蒞光

館以鄉里謁柳塘先生。先生爲予道名。命隸召予至縣。持菓酒引予詣諸先生寓。拜爲師。是月十五六。先公覓少盤費至蘇。求蘇庠舊友雷起東震。覓開元寺僧舍小房一間以居。廷光爲府學生。居學四一舍。故館居于此近處。每日晨謁先生求講。至端午。經講一遍。先生以上半年一歸餘姚。予亦歸謁柳塘先生。爲予出束修五金。七夕後。先生復至。予再上蘇。僧舍已居他人。求府教授李先生烜。江西浮梁人。失記其字。號與居嘉會亭廂房。先生願我。許開運舍爲爨。嘉會亭舊爲荒圃。亦曹府尊所搆。爲諸生講習所。然無居之者。舊傳此荒穢多鬼。予夜宿晨興。並無影響。十月初冬。先生欲歸。先公借一舟。命老僕陳定接予。宿二夜。則云。聞鬼聲而不能眠。豈予不德。鬼乃知所畏避耶。

宏治十三年庚申。年十九歲。時柳塘先生尙蒞吾縣。信之方先生來自崑山。日出後。登岸入院。揖後。柳塘請曰。常熟不送入學。久知縣考。幾個童生。容送考。信之先生曰。然。今日就送與庠。增科舉秀才同考。考得過。則送俱出外早飯。進考時。予與弟文鳳俱至儒英坊下。時大伯真齋先生居此。求庶伯母饗食而就考。命題四篇。四書下焉者起至蚤有響於天下者也。論世儒不知王政之本。經典策題今忘之。第三日發落秀才。有御史王原善善說事。不知爲誰說入學。啟端言童生有好奇。信之先生回云。有二童生倒記得論題。江陰發案。送入學二十四人。寄名一人。予爲第一。柳塘先生行取。秦從節諱禮先生代之。夏季考予爲第一。張起齋第二。秋季予第一。起齋復第二。至冬季。予第二。

宏治十四年辛酉。年二十歲。時當大比。秦知縣考送府應舉。予第四。府主曹先生首問曰。我考張某好。縣

考在何處。從節先生對以第四。前此季考。多第一。先生喜。時信之。方先生陞山東參議。新提學陳石峰先生未到。科舉則巡按袁大經先生代考。予蒙錄。先公止予一子。每出與俱。至南京三場畢。乏盤費。遷延數日而歸。是年。徐子高南州中十三名。予與起齋皆自咎曰。我二人可不中一百十三名。皆自策以圖後舉。至十月十五日。掌教河南李先生諱隆字世昌舉人石德行奉石峰教條。考誠意自修之首一論。殊不爲意。送卷即退。先生呼止。看畢。怒目而視曰。好聰明秀才。不用心。聞之。毛豎骨竦。遂知所以用心矣。至今懷我先生不忘焉。

宏治十五年壬戌。年二十一歲。自舊年十月。一聞李掌教先生之言。使覺大警。醒荷衣夜讀。至是年三月。覺有長益。四月。則石峰先生案臨歲考。命題丘也問有國有家者不患寡而患不均論。君臣始終兩全。策問匡衡。劉向。論甘陳功罪。何如初。作四書義。俱艱澁。及論自立一見。謂趙普與太祖君臣不能兩全。於太宗君臣何有策。則謂匡劉所論皆非常論。邦支宜伐。不宜伐。以定甘陳功罪。石峰先生取予爲第一。補廩起齋告先考第一聽廩。先生終不易也。自後作策論。頗得東坡三昧。至冬。則先公命婚。家事累心矣。宏治十六年癸亥。年二十二。封安人先室王氏于歸。時正月初八日。繼而封主事王東川。又爲其子王于田舜耕議家妹婚。先公手索。勉強完事。就一小館餬口。方始心安。而三月初四。予病忽作。又疾二親之心。上顧老祖母八十在堂。父母更無次子。新娶在室。家計蕭條。觸物傷悲。八九月麻甚。夜亦不寢。食亦不化。自思徒悲無益。棄書放懷。天不棄絕吾老父母。寢食漸安。欲以藥物輔助。而不能請醫。欲以飲食資養。而

不能備辦。勉強日用。幸而平安。

宏治十七年甲子年二十三。又當大比。理故籍。釋舊聞。三月盡。則石峰先生至府。考科舉矣。命題四篇。舉筆羞澁。全非舊時文思。取第九拆號。石峰先生驚訝。問汪訓師。韓氏對以舊年一年病。石峰言可知。不病安得在此。拔第三人。試禮記房考官。則宋璉扶病入院。次日。遂出禮記卷。待各房看。本房卷畢。分看。詩經房考官黃德卿先生。分看予卷。取爲首。送大主考費鵝湖。諱安。後入闈。曰。然二場稱之。至三場。只第一道策完。四道皆半篇。後查爲謄錄生抹截。費云不可取。德卿先生請弔卷。費曰。一弔卷。就有是非。德卿曰。禮記卷終不然。買了詩經房考官。何是非之有。費執不取。時同年姚繼巖亦欠一判。填草榜。俱無我二人。對卷。卷入。德卿先生首尋予卷。即時而獲。乃送費閱。費云。送府尹看。送監場看。俱云該取。乃填取第五。姚亦得中。第進士後。鵝湖亦以草榜見示。後去二名。不知何人。後中否也。初首場出。日尙二三竿。先公一見。問何如。對以有些意思。先公急市牛酒充飢。以待炊飯。命念文。則力不能也。先公又往候弟文鳳。予飯後。遂錄文完。先公與弟至場中散盡。而歸寓。意稍忿。送文看。遂忻然。是時又欠盤費。十六晚。就張起齋寓。欲附舟回家。適起齋他往。更深始回。至五鼓。起齋連呼先公。四伯。我不中。令郎必中。且連中進士。適夢於後園報中。五人有綠紗圍領也。到後巷張家去了。其夢俱合。起齋直至己卯方中第四。信乎數有前定也。九月初一日。蚤飯時。報者方至。先是日四更時。先岳母李孺人呼先室曰。夢汝官人中了。且中得高。有一黃帖。恰像你老太公扯破巷口袁先生。是先祖一樣。學官。隨報者至。予寫一賞帖銀三兩。適是黃箋。彼嫌少。

袁討看曰。誠少扯碎。似此瑣屑。亦見於夢耶。入京在丹陽道中。遇方伯周簡默出京。云見各試官云。貴縣張某。他祖宗有何陰德。中第五。不知又何欠缺。不中解元。其語皆同。則又悔不中解元矣。人心不足如此。然自今視之。亦中不得解元也。

宏治十八年己丑。年二十四。先公不舍獨子三千里外。舊歲冬至後。與予同起程。正月二十八日到京。隨行二村僕。不諳煤鍋煮爨。每食粗硬。初八日。則一僕病。二場先一日。病者死矣。三場俱先公送入。試畢。一時同會者。俱相與語予中。不知何以得之。後中六十九名。石城李老先生爲提調。一出榜。卽令人馳報。時三鼓矣。先公雖喜。與予皆若固有。聞寵不驚。默自幸先公多福。予常有後望。而先公壽止六十四。予僅守一郡。命與聞初場進呈題目。先敬皇帝焚香祝天。願得真才。爲國家用。方始閱題。今不知誰爲真才。誰得用也。三月十八日。殿試。崑山顧鼎臣爲榜首。榜眼董玘。卽會元。探花謝丕。經魁。開老謝遷子。予中二甲十二名。復取庶吉士。吾蘇則徐縉一人。閩老王鏊。增餘進士。分撥九卿衙門觀政。予撥刑部。求入廣東司。以陳東麓爲本司副郎。同縣相依也。正郎則劉綱。任邗人。字克立。主事沈練。字剛夫。嘉興人。劉喬。字世臣。慈谿人。高賁。字曾唯。江陰人。同司進士熊太。湖廣人。楊鉞。涿州人。先公以予獨子在外。卽於四月初十日。陸路言旋。圖送家室。先公至家。不越月。卽覓舟送家。小於七月到京。九月初。同年王仲申。捧詔南頒。先公附舟而歸。是年四月二十六日。散部。覺身不快。似有感冒。告假在寓。五月一日後。聞俱免朝。初七日。尙臥於床。將午。忽天色昏霾。狂風怒發。窗扇打開。碎瓦紛飛。良久方息。驚傳是時先敬皇帝賓天。在朝接本者。

俱見宮中黑氣一道冲天。中有衣黃者乘龍而上。次日力疾而出。隨班入臨。於呼。先皇帝至仁至聖。實受乾坤正大之氣。臣民無福。一旦升遐。龍馭上賓。見者固不妄也。

正德元年丙寅。年二十五。禮部奏請遣官分布天下。修孝宗實錄。予同今工部尚書顧可學。以浙江嘉靖初致仕。癸卯年行取授通政。陞今宣。往浙江。浙之上處進士孫景雲作玉山縣尹。故其妻某氏爲夫棺殮畢。佩其夫所愛二扇。經於柩前。節望開著。而該縣不詳憲請獎。予駁行該縣。君子常於有過中求無過。不當於無過中求過。某氏從容就死於夫殮之後。豈有生而失德。該縣乃始備其事入冊錄。上於朝。時禮部尚書邵先生國貞爲廉憲。吏部尚書陸先生全卿爲副憲。見之深以爲然。是年錄尙未成。九月爲祖母韓夫人壽歸虞山。

正德二年丁卯。年二十六。復往浙催僱實錄。時閣劉瑾擅權。復西廠行事。陰遣二校撫拾人過。入武林驛。聲勢赫然。巡按視之。亦真前席。於三司如無有。予末後往視之。二校大言大人修書。無事分賓主。送予門外。又言只大人衙門可到來拜。與之酒飯而去。是年十二月還朝。予授刑部河南司主事。有同入學張學失心。不知何能。至京改名天生。告一通狀至貴州司。云子佛生妻某氏。俱有官職。來京受封。時該司徐廷實問得其情。出題與彼破破又好。又爲予同學欲援救之。因攜予同至貴州司見學。羸然在彼。廷實先給以原挈帽襪。予謂學且安心。學言只有大菩薩小菩薩許我。見有朝服官帽來付。如何是好。廷實言其痴妄如此。不可放出。被走了。倒是我事。予做一大厚綿被。令其纏身。併月送米三斗。錢三百。着司獄看顧。

之急寫書報其父來引。至來春。隨會友至。學已先故。子爲棺殮瘞埋。其父開棺識認。收骸骨而歸。學本一好秀手。急於功名。遂至失心。遠走三千里。特死於刑獄。非子骨亦無收惜哉。廷實亦仁人。死而無後。何天道之遠也。

正德三年戊辰。年二十七。是年尚書屠先生諱勳致仕。左侍王先生諱鑑之。陞尚書。本司正郎周憲。湖廣人。字時敏。奉敕往廣東勘事。員外張瓊。江西人。原有痲疾。行履亦艱。欲捱陞郎中。且在司主事唐權。松江人。字季和。以引工事謫湖廣穀縣知縣。宋冕。餘姚人。字孔瞻。不久亦以微事謫江西臨州知縣。本司事。子獨任之。繼而周正郎陞大理府。瑾創例各部不拘通融轉陞。于是戶部郎中孫徽者。至與同僚多不合。至十月。朝審大處決。予所問囚。釋桎鐐付校尉。逕奔至堂下。予亦愕然。囚至。則叩頭不已。云謝了老爺去。予因溫慰之。莫不是冤枉了你。囚云。不冤。我自犯。該如此。又叩頭連聲。過世做驢馬報。老爺問我罪。並不會惡打我。一板。諺云。歡喜問囚。死而無怨。信哉。校尉押囚出。退食。孫郎中連揖予曰。長官問死囚。尚且不怨。孫某無知。失敬失敬。自是孫敬予。予亦敬孫。稍相得矣。孫亦耿介。終是見短識淺。問一教坊樂工。訟家財者。西廠一校。私一家。則請孫并部中開司寇。諱淵徐司徒。諱問同年方位。及兵部郎中汪舉。開約予往。予對以不請我。聞遂覺。不去。校居正陽門外。孫徐汪皆先歸。方戀飲。歸不及門。復至彼校宿。次日。彼對頭樂工。迎劉瑾東華門出。訴告。時洪先生方蒞部。與瑾相得。瑾庇其校不奏。擊止。與洪說謫孫開官於外。汪徐俸。方爲民。後聞孫至廣西僉事。不知的否也。部中僚友。僉許子爲不苟。聲聞漸著。遇時例擬改御史。年

未及而止。

正德四年己巳年二十八。仍任河南司主事。時劉宇爲吏部尙書。左侍郎張綏。創爲京官不時考察。工部左侍郎范士鳴曰。今日考察。惟張年兄不在心。考察日。張綵熟視予者久。有私引意。予終不入其門。遂止。正德五年庚午。年二十九。是年洪尙書改左都御史。鄆陵劉先生諱瑄代之。五月。風霾累日。遠近不辨。乃應在西北。安化王^{寶麟}造反。寧夏起用楊一清爲總制。御馬監太監張永監提議征安化。實無善謀。亦無預備。彼有一婦人王九兒。^{後亦被逮至京}會關鶯鵲神。神降稱安化爲老天子。遂萌逆。後見差去大理某官在彼清查。人心洶洶。遂與納粟都指揮何錦等殺所差官。一時創亂耳。亂後。方思用人。稱今封咸寧侯仇鉞。善謀且勇。欲得爲用。仇鉞不出。何錦勸安化必須親到相請。一入門。遂爲仇鉞父子所執。張永喜邀功。必欲到彼。楊一清亦至。搜其家資。鎗刀弓弩。亦無幾件。時予與閒靜中同在本科。楊一清。張永。本先到。押帶安化一起。在後。時十月日。予與閒靜中私議。所起發重犯數多。須分寄鎮撫司。都察院。本部三處監候。安化并家屬送諸王館。行戶部給飯。錦衣差官校防範。司禮監差官監守。應天少取老婦看仲其宮眷。本入。次早。輪子早。隨劉先生候於左順門。劉瑾與數閣紅袍玉帶。搖搖而出。呼劉尙書。遂授以本。劉先生接捧少視。隨手遞與予。旨意安化王日用飲食行令光祿寺辦。司禮監輪撥長隨看守。錦衣衛差官校巡視。其司禮監手本。例用堂上印。劉先生摘所佩印匙與予。就同九卿各堂上。出西華門。往迎張永入。其押安化一起。敕皇帝欲親視。予至部語司務廳。呼十三司吏縛草閣纏紙。另用標旗。寫囚犯名。一囚戴一插一。

從後載門入。西華門出。送部。予同該司點入。夜深方歸。明早。靜中輪早入朝。予平明至西長安門。門官邀予附耳言。劉瑾已擊入至左掖門。則劉先生各堂上俱出掖門矣。轉身隨後問靜中門上。劉瑾在否。云不在。是擊矣。少頃得旨。歷數瑾罪惡。奉御着去鳳陽司香。你法司便條陳他罪名來說。蓋張永回留身獨奏。安化。數劉瑾罪惡。指斥上榜文。武宗教皇帝即時遣人擊下劉瑾。故有此旨。堂上雖令該司官及十二司條陳。責在本科。午飯時。方與靜中條得數事。私議劉瑾罪惡。如何條陳得盡。得有旨打問成招。便好。頃間抄報吏持報至。劉瑾擊在午門前。你法司便會同各官打問明白來說。蓋吏科都給事中某。亦瑾所私鄉里。欲脫己。劾瑾數事。內稱瑾扇中藏刀。蓋瑾冬間用貂鼠皮爲大扇障風。中藏刺刀。其意不知如何行刺。刺何人也。瑾聞之曰。某亦劾我。瑾敗。吏部尙書張綏。錦衣衛都指揮楊玉。皆瑾鄉里。所寵私者。及門下鎮撫司指揮石文義。千戶張文冕。俱逮問。綏旣擊。吏部四司中亦黜二人。聞靜中調吏部考功司員外。本科補方日升。又予獨任其事矣。該司寫一會簿。送五府九卿各堂上。六科十三道公侯駙馬伯書名會問。舊例。午門前。只於錦衣衛直房門首。是日擊瑾纔定。不知何官傳言。上御門擊瑾。向前擊到午門御道東。跪其東邊王門。半開半掩。不見聞人聲影。百官自閣老李西涯。費鵝湖。而下。分文武班侍列。福建司主事王希孟。貴州司柴義。各以聲音洪亮。推宜旨意。及奏章宣訖。錦衣衛掌衛事指揮劉璋出班跪奏請旨。打多少。亦不聞傳語。須臾。即起云。有旨打四十。當直官校齊聲答應訖。有一官大聲云。打四十。擺着棍。五棍一換打每一宣言。則各官校齊聲答應如前。響振殿廷。劉瑾則跌絆反接。二宮僞官揪其腦髮。一根掠背挺。

直復有一闊皮條套其兩膝扣住。一棍壓定。用棍打其前腿。名曰攔馬五棍。畢。一官叫換棍。邀喝答應。一如前打四十後。方問。瑾垂頸片時不語。少頃。則張目四顧。云。滿朝大小官員。都是我起用的。只蔡駙馬開口。朝廷用人。如何是你起用。掌嘴。掌訖十下。多是蔡駙馬發問。瑾如何造甲。造穿宮牌。造御寶。俱不招。伏。有一官詰問。見今朝廷御門。奏請出來。蓋瑾擎朝廷。即籍其家違禁之物。已收在官。瑾始無辭。招說俱有。俱有。乃疎其縛畫字。予與日升揉其手良久。僅能扶筆。略成一十字。一官跪奏畫招了。叩頭而退。瑾仍監鎖撫司。該司僅具招草。俱予與日升次第。瑾惡百端。成招謀反罪。議後加參語。其劉瑾姪劉二漢。年十二歲。因參劉二漢律不加刑。但劉瑾招稱劉二漢後有大告。因此謀逆。罪坐所由。法難輕貸。數日後。早朝畢。奉旨劉瑾凌遲三日。剉尸梟首。仍畫影圖形。榜示天下。劉二漢一體處斬。是日。予同年陝西司主事胡遠。該監斬。錯愕告于尙書劉先生曰。我如何當得。劉回言。我叫本科幫你。予因應之。過官寓早飯。即呼本吏隨邀該司掌印正郎至西角頭。劉瑾已開刀矣。凌遲刀數。例該三千三百五十七刀。每十刀一歇。一歇喝頭一日。例該先剮三百五十七刀。如大指甲片。在胸膛左右起。初動刀。則有血流寸許。再動刀。則無血矣。人言犯人受驚。血俱入小腹。小腿肚。剮畢開膛。則血皆從此出。想應是也。至晚。押瑾順天府宛平縣寄監。釋縛數刻。瑾尙食粥兩碗。反賊乃如此。次日則押至東角頭。先日。瑾就刑。頗言內事。以麻核桃塞口。數十刀氣絕。時方日升在彼與同監斬御史具本奏。奉聖旨。劉親凌遲數足。剉尸。免梟首。受害之家。爭取其肉。以祭死者。剉尸當胸一大斧。胸去數丈。逆賊之報。亦慘矣。繼而都察院會審張綵輩四人。止在錦衣直

房前打問。各打欄馬三十間。擬張綵交結變亂斬罪。本入旨意。着再擊在午門前打問三日。張綵死。猶斬首。安化反叛。則在諸王館會問。問時。大理卿張先生諱綸。字大經。首問。你說再有何人。張永弟張容。以永安化功。已封彭城伯。年可三十三四。急過東班。止大理曰。如何這等問。死人口就于朝中亂指一人。擊好不擊好。大理慚而默。容雖執袴。如此事真有定見。大理不如。雖濫封彭城。亦異於庸衆也。問後。會本題進留中寫書。各王府議真鑄罪。先後俱到。則引赴文華殿前面勅。刑部侍郎讀彈章訖。次六科。次十三道。勅罷。青縵一卷。安化父子而出。殊不見其形也。次日。各堂上科道。于東闕門松樹下。會議真鑄罪。楊一清首言。不必引祖訓。我那時要殺他就殺了。各官默然。本部堂上反對予言。你要下筆去說。予性直。不知避忌。乃言祖訓不敢不引。彼時老先生若就陣上斬獲。事體與今日不同。一清不語。各官亦唯唯而散。予則見罪於一清。後兵部何先生諱鑑。欲調予兵曹。一清則沮抑不容矣。會本上。安化王着自盡。焚棄尸骸。以滅其迹。子某送西內。餘眷屬發鳳陽高牆居住。繼而陝西解劉瑾原籍人到。一一皆田夫。該司不問籍之同異。俱坐以斬罪。予爲參奏。劉瑾擅權謀反。彼何有一勾波及。後蒙旨俱發廣西煙瘴地面爲民。後雖不知死活。一時得生。亦二三十人矣。是年十二月。予陞山東司員外郎。仍在本科。

正德六年辛未。年三十。是年敕司禮太監張永。會三法司大審錄。部堂司都察院道大理左右寺俱先詣張永磚城外宅。請司寇明仲何先生鑑。自南兵部調至。先生年高。言不苟。謂予曰。太監便不知發放舊例。本科與言。固無辭。至審日。刑部覲顏彼左。初審枷號數十起。彼問何如。告以朝廷饒你。枷號開了。次則徒

罪各起告以再減一等發落。又次充軍。告以某該免。某不該免。永亦因此識彼。餘便自能矣。次日則審重囚。可矜可疑。應可改擬。遂起爲之言。彼亦能自斟酌也。事未竟。何先生改兵部。予亦陞四川司郎中。因求回司掌印。何曰。我轉兵部且在此。子何得便去。管印勉強完事。爲衆辛勤。衆且有十三司都郎之毀。一事完。卽推脫本科矣。

正德七年壬申。年三十一。任四川司郎中。逆瑾已除。國法釐正。然自閣宦擅專。終無盡一。六月。曾問一起徒罪。題本次日。左順門司禮太監張永怒云。如何不枷號充軍。尙書張先生諱子麟。忿忿謂予問擬不當。予對尙書言。瑾敗。不許忘引事例。某如何敢先壞法。尙書終是不平。予告以且待明日面語。司禮太監次早隨堂尊詣左順門。予執本立於柱側。永因舊年審錄識認。首肯予前。予言本內犯人事。彼云。如何不枷號充軍。予對以舊年審錄。例該枷號者釋放。充軍者多免。此犯不入例。因此不問。永舒手接本。逕從東華門出。午前則本出發落矣。尙書方釋然。是年秋。同府同年周希傳來京辨罪。周仕山東臨朐縣知縣。犯罪死。免死充軍。對予言。與我改本。我爲君算命。過兩日來謂。甲戌乙亥。這兩年象沒官做。可告養病。予不以爲然。其本予爲改削得旨。都察院對希傳言。好本與你行辯。希傳喜。急至。言于予。亦須信我算命。九月。中甸。同年劉克全堂審入司門。卽言年兄不要坐司了。予問如何。克全言見通報。廣東一大事。旨意法司俱選。差有風力給事中刑部郎中各一員前去。會同鎮守巡按勘問明白來說。非年兄而誰。安得再坐於此。心知不可脫。而謬爲大言以拒之。克全云。此本留閣下已三月。議差三法司錦衣尉各一員。上俱不肯。乃令